

# 'Gnothuich Bhoirionnach'

Chan eil leabhar sam bith coimhlionta an diugh gun fhacal àraidh do na boirionnaich! Gus nach bi *Gairm* air deireadh air a' chorr, tha sinn air cuireadh a thoirt do CHAIRISTIONA NICAOIDH—bana Mhuileach a tha pòsda aig Leódhasach—an rud a thogras i fhéin a dhèanamh ris na duilleagan so, fhad's a chumas i na boirionnaich air an dòigh agus fhad's nach maslaich i na fir!

Tha Cairistiona an dòchas gun gabh mnathan agus caileagan na Gaidhealtachd ùidh agus tlachd 'na cuid sgrìobhaidh, agus nach bi leisg orra sgrìobag a chur thuice mu ghnòthuich sam bith anns am bheil ùidh àraidh aca.

Bha dùil againn dealbh Cairistiona a chur air an duilleig so, ach an uair a thuirt sinn sin rithe 's ann a theab i an ceann 's na cluasan a thoirt dhinn. "Dealbh!" ars' ise. "Cha chuir no dealbh gus am faigh mise sìos am baile airson perm!" Agus leis a sin, thug i fhéin agus Alasdair agus Fìona, Leódhas orra, agus chan fhaca agus cha chuala sinne an corr bhuaipe bhon uair sin, ach a mhàin gun do chuir i thugainn an seanachas a leanas.—NA FIR-DEASACHAIDH.

**A**M bheil fhios agaibh dé a' cheud rud air am bheil mi a' dol a bhruidhinn? Tha—tighean! Chan eil an còrr air m'inntinn-sa an dràsda, oir tha mi fhéin agus Alasdair agus an tè bheag dìreach air an imrich a dhèanamh gu tigh briagha ùr ann an Glaschu! Tha ceithir bliadhna bhon a phòs sinn, agus 's ann a nise a tha sinn air tigh fhaotainn dhuinn fhéin. Agus cha sinne an aon fheadhainn—tha càraidean òga ann an Glaschu a tha air a bhith pòsda bho chionn bhliadhnachan nam bliadhnachan agus iad fhathast gun sgeul aca air àite còmhnuidh dhoibh fhéin; tha iad an dara cuid a' fuireach còmhla ri pàrantan, no a pàigheadh màl sgriosail ann an tigh duin-eile. Cha robh sinne idir dona dheth; bha sinn còmhla ri deagh Ghaidheil—feadhainn còmhla ris an robh sinn cho toilichte 's a thogramaid. Ach air a shon sin, rinn sinn toileachadh ri ar tigh beag fhéin!

Chan e gur e tigh beag a th'ann—trì seòmraichean cadail agus seòmar nighe, seòmar suidhe agus cidsin mòr soilleir. Ma tha sibhse de'n bhuidhinn fhortanaich aig am bheil fear de na tighean ùra a tha iad a' togail an diugh, cha leig mise leas innseadh dhuibh mu na goireasan a tha a' dèanamh obair tìghe nas fhasa 's nas inntinniche na b'àbhaist dhith bhith—àite teine nach leig leas ach suathadh beag le bréid fhliuch, dorsan agus ballachan cho réidh còmhnaid 's nach eil cothrom aig dust laighe orra, agus a liuthad nì eile, gun tighinn idir air gach àsuig fheumail a thainig an cois obair an dealain.

Faodaidh eadhon ceòl a bhith aig bean an tìghe an diugh an àm sgùraidh is glanaidh is nigheadaireachd. Cha mhór dhiubh leis nach toigh éisdeachd ri "Housewife's Choice" agus rudan mar sin. O nach tìgeadh an latha anns am faiceadh am BBC e iomchuidh cothrom a thoirt do mhnathan tìghe na Gaidhealtachd an rogha féin de òrain Ghàidhlig a chluinntinn uair no uaireigin! Tha mi cinnteach gum bheil gu leòir de luchd Beurla ris an còrdadh na h-òrain ged a dh'fhaodadh nach tuigeadh iad na facail.